

На хвалитех

Всякое дыхание: поставим стихи 4, глас 4: Подобен: Званный свыше:

1. Стих: Хвалите Его на силах Его,/ хвалите Его по мно́жеству вели́чества
Его́.

2. Стих: Хвалите Его во гласе трубнем,/ хвалите Его во псалти́ри и гу́слех.

**Прежде честнаго Креста Твоего и страда́ния,/ поим ихже проразсудил еси, от
свяще́нных учени́к,/ на Фаво́рскую Владыко возшел еси го́ру,/ показати
восхотев сим сла́ву Твою́,/ иже и видевшя Тя преобрази́вшяся,/ и па́че солнца
просия́вша,/ ницы падше, силе Твоей удиви́шася,/ взывающе: Ты безлетен
Свет еси́ Христэ́,/ и сия́ние Отчее, // аще и волею плоть явился еси,
неизме́нне. [Дважды.]**

3. Стих: Хвалите Его в тимпане и лице,/ хвалите Его во стру́нах и орга́не.

**Иже прежде век сый Бог Сло́во,/ Иже светом яко ризою одева́йся,/
преобразу́ющийся пред ученики Твои́ми,/ паче солнца, Слове, просия́л еси:/
Моисей же и Илия Тебе предста́ша,/ ме́ртвым и живым Тя Господа
пове́дающе,/ и Твое славяще неизреченное смотре́ние и ми́лость,/ и многое
милосе́рдие,/ и́мже спа́сл еси ми́р, // грехом погиба́ющий.**

4. Стих: Хвалите Его в кимвалех доброгласных, хвалите Его в кимвалех
воскли́цаня./ Всякое дыхание да хва́лит Го́спода.

**От Девическаго облака Тя рождéнна,/ и плоть бывша, и на горе Фаворстей
преобразу́ющася,/ Го́споди, и облаком светлым Тя окружа́ема,/ глас
Родителей, возлюбленнаго Тя Сы́на,/ учеником предстоящим Тебе яве
сказова́ше,/ я́ко единасу́щна и единопресто́льна./ Темже Петр удиви́ася,
добро есть зде быти глаго́лаше,/ не ве́дый еже глаго́лаше, // Благодетелю
Многоми́лостиве.**

Слава, и ныне, глас 8: [Византиево:]

**Поят Христос Петра, Иакова и Иоáнна,/ на гору високу едины,/ и
преобрази́ся пред ни́ми:/ и просвети́ся лице Его яко со́лнце,/ ри́зы же Его
быша белы́ я́ко свет:/ и яви́шася Моисей и Илия́ с Ним глаго́люще,/ и о́блак
светел осени́ их./ И се глас из облака глаго́лющ:/ Сей есть Сы́н Мой
возлю́бленный, // о Немже благоволих, Того послу́шайте.**

Славословие великое, и отпуст.